

四庫全書

史部

欽定四庫全書

史部

遼史卷

二十五至三十

詳校官庶吉士_臣龍廷槐

給事中_臣查善長覆勘

總校官編修_臣朱鈐

校對官助教_臣李巖

謄錄監生_臣劉星軫

欽定四庫全書

遼史卷二十五

元中書右丞相總裁托克托等修

本紀第二十五

道宗五

三年春正月乙卯如魚兒濼甲戌出錢粟振南京貧民
仍復其租賦己卯大雪二月丙戌發粟振中京饑甲辰
以民多流散除安泊逃戶徵償法三月乙卯高麗遣使

來貢已未免錦州貧民租一年甲戌免上京貧民租如
錦州庚辰女直貢良馬夏四月戊子賜中京貧民帛免
諸路貢輸之半丙申賜威烏爾古部貧民帛庚子如涼
陁甲辰南府宰相王績薨乙巳詔出戶部司粟振諸路
流民及義州之饑五月庚申海雲寺進濟民錢千萬秋
七月丙辰獵黑嶺丁巳出雜帛賜興聖宮貧民庚午大
雨罷獵丁丑秦越國王阿林薨九月乙丑駐蹕錫里濟
冬十月庚辰以參知政事王經為三司使壬辰罷節度

使已下官進珍玩癸卯追封秦越國王阿林為秦魏國
王十一月甲寅特哩袞耶律坦同知南京留守事遼興
軍節度使耶律旺玖為南府宰相十二月己卯朔以樞
密直學士呂嗣立參知政事

四年春正月庚戌如混同江甲寅太白晝見甲子五國
部長來貢庚午免上京逋逃及貧戶稅賦甲戌以上京
南京饑許良人自鬻丁丑曲赦西京役徒二月己丑如
魚兒灤甲午曲赦春州役徒終身者皆五歲免己亥如

春州赦泰州役徒三月乙丑免高麗歲貢己巳振上京
及平錦來三州饑夏四月己卯振蘇吉復淶鐵五州貧
民并免其租稅甲申振慶州貧民乙酉減諸路常貢服
御物丁酉立入粟補官法癸卯西幸召樞密直學士耶
律儼講尚書洪範五月辛亥命燕國王延禧寫尚書五
子之歌乙卯振祖州貧民丁巳詔免役徒終身者五歲
免之己未振春州貧民丙寅禁挾私引水犯田六月庚
辰駐蹕散水原丁亥命燕國王延禧知中丞司事以同

知南院樞密使事耶律鼎峙知右伊勒希巴知右伊勒希巴事耶律納延同知南院樞密使事北院樞密使事耶律佛德致仕秋七月戊申曲赦奉聖州役徒丙辰遣使冊李乾順為夏國王庚申如秋山己巳禁錢出境八月庚辰有司奏宛平永清蝗為飛鳥所食庚寅謁慶陵冬十月丁丑獵遼水之濱己卯駐蹕藕絲淀癸未免百姓所貸官粟己丑知北院樞密使事耶律阿蘇封漆水郡王癸巳以伊實大王耶律迪里知西北路招討使事權

知西北路招討使事蕭休格知伊實大王事壬寅詔諸部長官親鞫獄訟十一月庚申興中府民張化法以父兄犯盜當死請代皆免十二月戊寅南府宰相耶律旺玖致仕癸未以孟父詳袞耶律慎思為中京留守閏十月癸卯朔預行正旦禮丙午如混同江

五年春正月癸未如魚兒灤甲午高麗遣使來貢三月癸酉詔析津大定二府精選舉人以聞詔諭學者當窮經明道夏四月甲辰以知奚六部大王事尼格為本部

大王壬子獵北山甲子霖雨罷獵五月丁亥駐蹕齊老
嶺己丑以準布磨古斯為諸部長癸巳回鶻遣使貢良
馬己亥以同知南院樞密使事耶律納延知右伊勒希
巴事左祗候郎君班詳袞耶律聶哱知北院大王事六
月甲寅夏國遣使來謝封冊壬戌以參知政事王言敷
為樞密副使前樞密副使賈士勲參知政事兼同知樞
密院事秋七月庚午獵沙嶺九月辛卯遣使遺宋鹿脯
壬辰駐蹕藕絲淀冬十月乙巳以新定法令太煩復行

舊法庚申以遼興軍節度使哈噶為伊實大王十一月
丁卯朔燕國王延禧生子大赦妃之族屬進爵有差

六年春正月如混同江二月辛丑駐蹕雙山三月辛未
女直國來貢夏四月丁酉東北路統軍司設掌法官庚
子以同知南院樞密使事耶律托多知左伊勒希巴事
五月壬辰駐蹕散水原六月甲寅遣使決五京囚秋七
月丙子如黑嶺冬十月丁酉駐蹕藕絲淀十一月壬戌
高麗遣使來貢己巳以南府宰相竇景庸為武定軍節

度使是年放進士文充等七十二人

七年春正月壬戌如混同江二月己亥駐蹕魚兒灤壬寅詔給渭州貧民耕牛布絹三月丙戌駐蹕黑龍江夏四月丙辰以漢人行宮副部署耶律古雲知伊實大王事五月己未朔日有食之六月甲午駐蹕齊老嶺己亥倒塌嶺人進古鼎有文曰萬歲永為寶用辛丑回鶻遣使貢方物癸卯以權知東京留守蕭托輝為契丹行宮都部署丁未端拱殿門災秋七月戊午朔回鶻遣使來

貢異物不納厚賜遣之八月庚寅以霖雨罷獵壬寅幸慶州謁慶陵九月丙申還上京己亥日本國遣鄭元鄭心及僧應範等二十八人來貢冬十月辛巳命燕國王延禧為天下兵馬大元帥總北南院樞密使事十一月庚子如藕絲淀甲子望祀木葉山

八年春正月乙酉如山榆淀乙未準布諸長來降三月己亥駐蹕圖塔實淀丁未曲赦中京蔚州役徒夏四月乙卯準布來貢丁丑獵西山提克德酋長呼喇濟來附

五月甲辰駐蹕齊老嶺六月乙丑夏國為宋侵遣使乞
援秋七月丁亥獵沙嶺九月乙巳駐蹕藕絲淀丁未日
本國遣使來貢冬十月庚戌朔遣使遺宋鹿脯丙辰振
西北路饑辛酉準布磨古斯殺金吾特古斯以叛遣奚
六部圖哩耶律果桑發諸部兵討之壬申南府宰相王
荆薨戊寅以左伊勒希巴耶律聶哱為彰聖軍節度使
十一月戊子以樞密副使王是敦兼知樞密院事權參
知政事韓資讓參知政事漢人行宮都部署奚和勒傳

知奚六部大王事丁酉以通州潦水害稼遣使振之戊申北院大王赫魯薨是年放進士冠尊文等五十三人九年春正月庚辰如混同江二月磨古斯來侵三月西北路招討使耶律和囉木薩噶追磨古斯還都監蕭章吉特遇賊與戰不利二室韋伊喇北王府特們羣牧宮分等軍多陷沒夏四月興中府甘露降遣使祠佛飯僧癸酉獵西山六月丁未朔駐蹕散水原庚申以遼興軍節度使榮格為南院大王知左伊勒希巴事耶律托多

為左伊勒希巴秋七月如黑嶺壬寅遣使賜高麗羊九月癸卯振西北路貧民冬十月庚戌有司奏磨古斯詣西北路招討使耶律托卜嘉偽降既而乘虛來襲托卜嘉死之準卜烏庫哩叛達勒達博索摩竝寇倒塌嶺壬子遣使籍諸路兵癸丑以南院大王特默同知南京留守事命鄭嘉努率兵往援倒塌嶺甲寅駐蹕藕絲淀以左伊勒希巴耶律托多圍場都管薩巴竝為西北路行軍都監乙卯詔以馬三千給烏爾古部丙辰準布長希

達掠西路羣牧丁巳振西北路貧民己未燕國王延禧
生子肆赦妃之族屬竝進級壬戌以樞密直學士趙廷
睦參知政事同知南院樞密使事癸亥烏爾古德喀勒
統軍使蕭休格奏討準布等部捷甲子宋遣使告其母
后曹氏哀即遣使弔祭己巳詔廣積貯以備水旱十一
月辛巳特默等奏討準布捷十二月丙辰宋遣使以母
后遺留物來饋

十年春正月如春水癸未提克德來貢戊子烏爾

等來降達勒達博索摩等來侵四捷軍都監特默死之二
月甲辰以破準布賞有功者丙午西南面招討司奏討
博索摩捷癸丑巴雅爾布琳通古和克布格等來降達
勒達來侵三月壬申朔日有食之山北路副部署蕭阿
嚕岱奏討達勒達捷夏四月壬寅朔提克德敏達蘇魯
克都等來附詔復舊地甲辰駐蹕春州北平淀丙午烏
爾古部節度使耶律辰嘉努奏討察察哩捷庚戌以知
北院樞密使事耶律額特埒為都統伊勒希巴耶律托

多為副統龍虎衛上將軍耶律呼哩都監討磨古斯遣
積慶宮使蕭扎里監戰辛亥休格奏伯哩八部來侵擊
破之己巳除玉田蜜雲流民租賦一年閏月庚子賜西
北路貧民錢達勒達博索摩二部來降五月甲辰駐蹕
齊老嶺甲寅括馬戊午西北路招討司奏德呼勒等部
來侵統軍司兵與戰不利招討司兵擊破之敦睦宮太
師耶律愛努及其子死之辛酉以知國舅詳袞事蕭阿
里同領西北路行軍事六月辛未宋遣使來謝弔祭乙

酉烏爾古德呼勒統軍使休格有罪除名丙戌和囉噶
等部來聘提克德來貢己亥禁邊民與番部為婚是夏
高麗國王運薨子昱遣使來告即遣使賻贈秋七月庚
子朔獵赤山是月準布等寇倒塌嶺盡掠西路羣牧馬
去東北路統軍使耶律實岱以兵追及盡獲所掠而還
九月己未南院大王特默為南院樞密使甲子德呼勒
諸酋來降釋其罪是月額特埒破磨古斯冬十月丙子
駐蹕藕絲淀壬午山北路副部署蕭阿魯岱以討達勒

達功加左金吾衛上將軍癸巳西北路統軍司獲準布
長碩博和富魯等來獻十一月乙巳提克德通古準布
迪里等來降達勒達博索摩等復來侵山北副部署阿
魯岱擊敗之十二月癸酉三河縣民孫賓及其妻皆百
歲復其家甲戌以參知政事趙廷睦兼同知樞密院事
樞密副使王師儒參知政事兼同知樞密院事己卯詔
錄西北路有功將士及戰沒者贈官乙酉詔改明年元
減雜犯死罪以下仍除貧民租賦戊子西北路統軍司

奏討磨古斯捷

遼史卷二十五

欽定四庫全書

遼史卷二十六

元中書右丞相總裁托克托等修

本紀第二十六

道宗六

壽隆元年春正月己亥如混同江庚戌西南面招討司
奏博索摩來侵蕭阿魯岱等擊破之乙卯振奉聖州貧
民二月戊辰賜左右二皮室貧民錢癸酉高麗遣使來

貢乙亥駐蹕魚兒灤三月丙午賜東北路貧民絹夏四月丁卯額特埒奏討額圖格爾捷乙亥女直遣使來貢庚寅錄西北路有功將士五月乙未朔以左伊勒希巴耶律托多為特哩袞南京宣徽使耶律特默為北院大王癸卯贈陣亡者官丁巳駐羅特哩嶺六月巳巳以知奚六部大王事和勒博為本部大王權參知政事趙孝嚴為漢人行宮都部署圍場都管薩巴以討準布功加鎮國大將軍癸巳準布長約羅岱及塔瑪噶來貢秋七

月庚子準布長敏達蘇等來貢癸卯獵沙嶺癸丑伯哩
八部來附進方物甲寅額特埒奏討磨古斯捷九月甲
寅祠木葉山丙辰詔西京礮人弩人教西北路漢軍冬
十月甲子駐蹕藕絲淀甲戌以北面林牙耶律大悲努
為右伊勒希巴癸未以參知政事王師儒為樞密副使
漢人行宮都部署趙孝嚴參知政事壬辰錄討準布有
功將士十一月丙申女直遣使進馬己亥以都統額特
埒為西北路招討使封漆水郡王甲辰夏國進貝多葉

佛經庚申高麗王昱疾命其子顯權知國事十二月癸亥朔以知北院樞密使事耶律阿蘇為北院樞密使是年放進士陳衡甫等百三十人

二年春正月甲午如春水癸卯西南面招討司討博索摩破之乙卯駐蹕錫訥蘇辛酉市牛給烏爾古德噶勒威烏爾古部貧民二月癸亥振達木琳巴古部夏四月己卯振西北邊軍六月辛酉駐蹕薩拉納秋七月甲午準布來貢丙午臘赤山八月乙丑伯哩八部進馬九月

丙午徙烏爾古德呼勒部于烏納水以抗北邊之衝冬
十月戊辰駐蹕藕絲淀庚辰高麗遣使來貢十二月己
未額特埒討默爾吉破之壬戌南府宰相耶律都勒斡
致仕癸亥以蕭托卜嘉為北府宰相耶律大悲努殿前
都點檢乙亥夏國獻宋俘

三年春正月丁亥如春水壬寅烏爾古部節度使耶律
辰嘉努以功加尚書右僕射癸卯駐蹕雙山二月丙辰
南京水遣使振之閏月丙午準布長穆色克年布爾古

長托果斯默爾吉長呼喇巴等請復舊地貢方物從之
三月辛酉燕國王延禧生子賜名塔魯妃父長格遷左
監門衛上將軍仍賜官屬錢是春高麗王昱薨夏四月
南府宰相趙廷睦出知興中府事參知政事牛溫舒兼
同知樞密院事五月癸亥額特埒討準布破之己巳駐
蹕薩拉納六月甲申詔罷諸路馳驛貢新丙戌詔每冬
駐蹕之所宰相以下構宅毋役其民辛丑夏人來告宋
城要地遣使之宋諭與夏和庚戌以契丹行宮都部署

耶律烏頁為南院大王秋七月壬子朔獵黑嶺八月己亥博羅滿達勒部長率其民歸乙巳彗星見西方九月壬申駐蹕藕絲淀丁丑以武定軍節度使梁援為漢人行宮都部署戊寅額特埒奏討默爾吉捷己卯五國部長來貢冬十月庚戌以西北路招討使額特埒為南府宰相十一月乙卯博囉滿達勒來貢戊午以安車召醫巫閭山僧志達己未以中京留守韓資讓知樞密院事同知南院樞密使事蕭藥師努知右伊勒希巴事丁丑

西北路統軍司奏討默爾吉捷

四年春正月壬子如魚兒灤已已徙準布等貧民于山
前辛未宋遣使來饋錦綺三月庚午幸春州丙子有司
奏黃河清夏四月辛丑以雨罷獵五月癸酉納延奏北
邊捷甲戌駐蹕薩拉納六月戊寅朔夏國為宋所攻求
援丁亥以遼興軍節度使聶呼為特哩袞前知特哩袞
事耶律果桑為南京統軍使甲午以參知政事牛溫舒
兼知中京留守事秋七月戊午如黑嶺冬十月乙亥朔

駐蹕藕絲淀己卯以南府宰相額特埒兼契丹行宮都
部署以傳燕國王延禧十一月乙巳朔知右伊勒希巴
事蕭藥師努樞密直學士耶律儼使宋諷與夏和辛酉
夏復遣使求援十二月壬辰為燕國王延禧行再生禮
曲赦三百里內囚

五年春正月乙巳如魚兒濼乙丑詔夏國王李乾順伐
博索摩等部夏五月壬戌藥師努等使宋迴奏宋罷兵
癸亥謁乾陵戊辰以南府宰相額特埒兼西北路招討

使禁軍都統巴已駐蹕汾柳湖六月甲申以奚六部大王和勒博為契丹行宮都部署知右伊勒希巴事蕭藥師努南面林牙兼知契丹行宮都部署事乙未五國部長來朝戊戌準布來貢己亥以興聖宮使赫嘉努為右伊勒希巴秋七月壬寅提克德長托迪來貢辛亥如達里庫山閏九月丙子駐蹕都爾嘉冬十月己亥朔高麗王顯遣使乞封冊丁巳額特埒奏討額圖格爾捷丙寅以同知南京留守事蕭塔喇台知北院樞密使事丁卯

宋遣郭知章曹平來聘戊辰振遼州饑仍免租賦一年十一月甲戌振南北二紂乙酉夏國以宋罷兵遣使來謝十二月甲子以參知政事趙孝嚴為漢人行宮都部署漢人行宮都部署梁援為遼興軍節度使

六年春正月癸酉南院大王耶律烏頁魯壬午以太師致仕托海起為奚六部大王丁亥如春水辛卯額特埒執磨古斯來獻丙申詔問民瘼二月丁未以烏爾古部節度使辰嘉努為南院大王己酉磔磨古斯于市癸丑

出絹賜五院貧民辛酉宋遣使告宋主煦殂弟佶嗣位
即遣使吊祭三月甲申弛朔州山林之禁夏四月丁酉
朔日有食之癸卯如炭山五月壬午烏爾古部討察察
哩破之乙酉漢人行宮都部署趙孝嚴薨丙戌駐蹕納
克灤辛卯宋饋先帝遺物乙未以東京留守和囉木薩
噶為特哩袞南院宣徽使蕭常格為漢人行宮都部署
六月庚子遣使賀宋主辛丑以有司案牘書宋主嗣位
為登寶位詔奪宰相鄭顥以下官出顥知興中府事韓

資讓為崇義軍節度使御史中丞韓君義為廣順軍節度使癸丑準布長來貢戊午遣使決五京滯獄己未以遼興軍節度使梁援為樞密副使秋七月庚午如沙嶺壬申額圖格爾諸部寇西北路八月額特埒以兵敗之使來獻捷九月癸未望祠木葉山戊子駐蹕藕絲淀冬十月壬寅以樞密副使王師儒監修國史癸卯五國諸部長來貢甲寅以平州饑復其租賦一年十一月壬申以天德軍民田世榮三世同居詔官之令一子三班院

祇候丙子召醫巫閭山僧志達設壇內殿戊子夏國王
李乾順遣使請尚公主十二月乙未女直遣使來貢巳
亥以知右伊勒希巴事赫嘉努為北面林牙辛亥詔燕
國王延禧擬注大將軍以下官庚申鐵驪來貢宋遣使
來謝帝不豫是歲封高麗王顯為三韓國公放進士康
秉儉等八十七人

七年春正月壬戌朔力疾御清風殿受百官及諸國使
賀是夜白氣如練自天而降黑雲起于西北疾飛有聲

北有青赤黑白氣相雜而落癸亥如混同江甲戌上崩
于行宮年七十遺詔燕國王延禧嗣位六月庚子上尊
諡曰仁聖大孝文皇帝廟號道宗

贊曰道宗初即位求直言訪治道勸農興學救蓄恤患
粲然可觀及夫謗訕之令既行告訐之賞日重羣邪竝
興讒巧競進賊及骨肉皇基寢危衆正淪胥諸部反側
甲兵之用無寧歲矣一歲而飯僧三十六萬一日而祝
髮三千徒勤小惠蔑計大本尚足與論治哉

遼史卷二十六

遼史卷二十六考證

壽隆元年夏四月乙亥三年二月丙辰朔閏月丙午五
年春正月乙丑六年十一月壬申 按歷象志朔考

壽隆元年四月丙寅朔三年二月丙辰朔閏月丙戌
朔五年正月甲辰朔六年十一月癸亥朔原文乙亥
訛己亥丙辰訛甲辰乙丑訛乙巳壬訛壬寅並以
干支推算改正至丙午為閏二月之二十一日史未

書閏并增

以知奚六部大王事和勒博為本部大王 按和勒博
舊作回離保此又作回里不係一人今畫一改

遼史卷二十六考證

欽定四庫全書

遼史卷二十七

元中書右丞相總裁托克托等修

本紀第二十七

天祚皇帝一

天祚皇帝諱延禧字延寧小字阿果道宗之孫父順宗
大孝順聖皇帝母貞順皇后蕭氏太康元年生六歲封
梁王加守太尉燕中書令後三年進封燕國王大安七

年總北南院樞密使事加尚書令為天下兵馬大元帥
壽隆七年正月甲戌道宗崩奉遺詔即皇帝位于樞前
羣臣上尊號曰天祚皇帝二月壬辰朔改元乾統大赦
詔為耶律伊遜所誣陷者復其官爵籍沒者出之流放
者還之乙未遣使告哀于宋及西夏高麗乙巳以北府
宰相蕭烏納為遼興軍節度使加守太傅三月丁卯詔
有司以張孝傑家屬分賜羣臣甲戌召僧法頤放戒于
內庭夏四月早六月庚寅朔如慶州甲午宋遣王潛等

來弔祭丙申高麗夏國各遣使慰奠戊戌以南府宰相
額特埒兼南院樞密使庚子追諡懿德皇后為宣懿皇
后壬寅以宋魏國王和囉噶為天下兵馬大元帥己
以北平郡王淳進封鄭王丁未北院樞密使耶律阿蘇
加裕悅辛亥葬仁聖大孝文皇帝宣德皇后于慶陵秋
七月癸亥準布鐵驪來貢八月甲寅謁慶陵九月壬申
謁懷陵乙亥駐蹕藕絲淀冬十月壬辰謁乾陵甲辰上
皇考昭懷太子諡曰大孝順聖皇帝廟號順宗皇妣曰

貞順皇后十二月戊子以樞密副使張琳知樞密院事翰林學士張奉珪參知政事兼同知樞密院事癸巳宋遣黃實來賀即位丁酉高麗夏國並遣使來賀己巳詔先朝已行事不得陳告初以英格為生女直部節度使其俗呼為太師是歲英格死傳于兄之子武雅淑武雅淑死其弟阿固達襲

二年春正月如鴨子河二月辛卯如春州三月大寒冰復合夏四月丁亥詔誅伊遜黨徙其子孫于邊發伊遜

塔喇台之墓剖棺戮屍以其家屬賜被殺之家五月乙丑額特埒獻額圖格爾等部捷六月壬辰以雨罷獵駐蹕散水原丙午夏國王李乾順復遣使請尚公主丁未南院大王辰嘉努致仕壬子李乾順為宋所攻遣李造福田若水求援閏月庚申策賢良壬申降惠妃為庶人秋七月獵黑嶺以霖雨給獵人馬準布來侵額特埒等戰敗之冬十月乙卯蕭哈里叛劫乾州武庫器甲命北面林牙赫嘉努捕之蕭哈里奔彭楚水阿克展部丙寅

以南府宰相耶律額特埒為北院樞密院參知政事牛
溫舒知南院樞密使事十一月乙未赫嘉努以不獲蕭
哈里免官壬寅以上京留守耶律慎思為北院樞密副
使有司請以帝生日為天興節

三年春正月辛巳朔如混同江女直函蕭哈里首遣使
來獻戊申如春州二月庚午以武清縣大水弛其陂澤
之禁夏五月戊子以獵人多亡嚴立科禁乙巳清暑齊
老嶺丙午謁慶陵六月辛酉夏國王李乾順復遣使請

尚公主秋七月中京雨雹傷稼冬十月甲辰如中京已未吐蕃遣使來貢庚申夏國復遣使求援己巳有事于觀德殿十一月丙申文武百官加上尊號曰惠文智武聖孝天祚皇帝大赦以宋魏國王和囉噶為皇太叔梁王塔魯封燕國王鄭王淳為東京留守封越國王百官各進一階丁酉以特哩袞耶律和囉木薩噶為南院大王戊戌以受尊號告廟己巳謁太祖廟追尊太祖之高祖曰昭烈皇帝廟號肅祖妣曰昭烈皇后曾祖曰莊敬皇

帝廟號懿祖妣曰莊敬皇后召監修國史耶律儼纂太祖諸帝實錄十二月戊申如藕絲淀是年放進士馬恭回等百三人

四年春正月戊子幸魚兒灤壬寅獵木嶺癸卯燕國王塔魯薨二月丁丑布古德遣使來貢夏六月甲辰駐蹕旺國崖甲寅夏國遣李造福田若水求援癸亥吐蕃遣使來貢秋七月南京蝗庚辰獵南山癸未以西北路招討使蕭塔喇台北院樞密副使耶律慎思並知北院

樞密使事辛卯以同知南院樞密使事蕭廸里為西北
路招討使冬十月己酉鳳凰見于渚陰己未幸南京十
一月乙亥御迎月樓賜貧民錢十二月辛丑以張琳為
南府宰相

五年春正月乙亥夏國遣李造福等來求援且乞伐宋
庚寅以遼興軍節度使蕭常格為北府宰相丁酉遣樞
密直學士高端禮等諷宋罷伐夏兵二月癸卯微行視
民疾苦丙午幸鴛鴦灤三月壬申以族女南仙封成安

公主下嫁夏國王李乾順夏四月甲申射虎炭山五月
癸卯清暑南崖壬子宋遣曾孝廣王戩報聘六月甲戌
真國遣使來謝及貢方物己丑幸哈爾吉秋七月謁慶
陵九月辛亥駐蹕藕絲淀乙卯謁乾陵冬十一月戊戌
禁商賈之家應進士舉丙辰高麗三韓國公王顥薨子
倭遣使來告十二月己巳夏國復遣李造福田若水求
援癸酉宋遣林洙來議與夏約和

六年春正月辛丑遣知北院樞密使蕭塔喇台知南院

樞密使事牛溫舒使宋諷歸所侵夏地夏五月清暑散
水原六月辛巳夏國遣李造福等來謝秋七月癸巳準
布來貢甲午如黑嶺庚子獵鹿角山冬十月己亥宋與
夏通好遣劉正符曹穆來告庚辰以皇太叔南京留守
和囉噶兼特哩袞東京留守越王淳為南府宰相十一
月乙未以謝家努為南院大王瑪諾勒為奚六部大王
丙申行柴冊禮戊戌大赦以和囉噶為義和仁聖皇太
叔越王淳進封魏國王封皇子額魯溫為晉王寶納埒

為饒樂郡王己亥謁太祖廟甲辰祠木葉山十二月己巳封耶律儼為漆水郡王餘官進爵有差

七年春正月釣魚于鴨子河二月駐蹕大魚濼夏六月次散水原秋七月如黑嶺冬十月謁乾陵獵醫巫閭山是年放進士李石等百人

八年春正月如春州夏四月丙申封高麗王侯為三韓國公贈其父顯為高麗國王五月清暑散水原六月壬辰西北路招討使蕭迪里率諸番來朝丙申射柳祈雨

壬寅夏國王李乾順以成安公主生子遣使來告丁未如黑嶺秋七月戊辰以雨罷獵冬十二月己卯高麗遣使來謝

九年春正月丙午朔如鴨子河二月如春州三月戊午夏國以宋不歸地遣使來告夏四月壬午五國部來貢六月乙亥清暑特哩嶺秋七月隕霜傷稼甲寅獵于哈爾吉八月丁酉雪罷獵冬十月癸酉望祀木葉山丁丑詔免今年租稅十二月甲申高麗遣使來貢是年放進

士劉楨等九十人

十年春正月辛丑預行立春禮如鴨子河六月庚午朔
駐蹕大魚澤夏四月丙子五國部長來貢丙戌預行再
生禮癸巳獵于北山六月甲戌清暑玉丘癸未夏國遣
李造福等來貢甲午準布來貢秋七月辛丑謁慶陵閏
月辛亥謁懷陵己未謁祖陵壬戌皇太叔和囉噶費九
月甲戌免重九節禮冬十月駐蹕藕絲淀十二月己酉
改明年元是歲大饑

天慶元年春正月釣魚于鴨子河二月如春州三月乙亥五國部長來貢夏五月清暑散水原秋七月獵冬十月駐蹕藕絲淀

二年春正月己未朔如鴨子河丁丑五國部長來貢二月丁酉如春州幸混同江釣魚界外生女直酋長在千里內者以故事皆來朝適遇頭魚宴酒半酣上臨軒命諸首次第起舞獨阿固達辭以不能諭之再三終不從他日上密謂樞密使蕭奉先曰前日之燕阿固達意氣

雄豪顧視不常可託以邊事誅之否則必貽後患奉先
曰粗人不知禮義無大過而殺之恐傷向化之心假有
異志又何患其弟武奇邁尼雅滿瑚實等嘗從獵能呼
鹿刺虎搏熊上喜輒加官爵夏六月庚寅清暑南崖甲
午和州回鶻來貢戊戌成安公主來朝甲辰準布來貢
秋七月乙丑獵南山九月己未射獲熊燕羣臣上親御
琵琶初阿固達混同江燕歸疑上知其異志遂稱兵併
旁近部族女直卓克算阿古齊拒之阿固達虜其家屬

二人走訴咸州詳哀司送北樞密院樞密使蕭奉先作
常事以聞上仍送咸州詰責欲使自新後數召阿固達
竟稱疾不至冬十月辛亥高麗三韓國公王保之母死
來告即遣使致祭起復是月駐蹕奉聖州十一月乙卯
幸南京丁卯謁太祖廟是年放進士韓昉等七十七人
三年春正月丙寅賜南京貧民錢丁卯如大魚濤甲戌
禁僧尼破戒丙子獵狗牙山大寒獵人多死三月籍諸
道戶徙達里庫山圓場地居民于別土阿古達一日率

五百騎哭至咸州衆大驚翌日赴詳衮司與卓克算等面折庭下阿固達不屈送所司問狀一夕遁去遣人訴于上謂詳衮司欲見殺故不敢留自是召不復至夏閏四月李洪以左道聚衆為亂支解分示五京六月乙卯烏梁海國遣使來貢良犬丙辰夏國遣使來貢秋七月辛秋山九月駐蹕藕絲淀十一月甲午以三司使虞融知南院樞密使事西南面招討使蕭樂古為南府宰相十二月庚戌高麗遣使來謝致祭癸丑回鶻遣使來

貢甲寅以樞密直學士馬人望參知政事丙辰知樞密院事耶律儼薨癸亥高麗遣使來謝起復

四年春正月如春州初女直起兵以赫舍哩部人阿蘇不從遣其部薩該討之阿蘇弟達呼布來告詔諭使勿討不聽阿蘇來奔至是女直遣使來索不發夏五月清暑散水原秋七月女直復遣使取阿蘇不發乃遣侍御阿息保問境上多建城堡之故女直以慢語答曰若還阿蘇朝貢如故不然城未能已遂發渾河北諸軍益東北

路統軍司阿固達與弟尼雅滿瑚實等謀以尼楚赫伊
呼羅索棟摩等為帥集女直諸部兵擒遼障鷹官及攻
寧江州東北路統軍司以聞時上在慶州射鹿聞之畧
不介意遣海州刺史高仙壽統渤海軍應援蕭托卜嘉
遇女直戰敗于寧江東冬十月壬寅以守司空蕭嗣先為
東北路都統靜江軍節度使蕭托卜嘉為副發契丹奚
軍三千人中京禁兵及土豪二千人別選諸路武勇二
千餘人以虞候崔公義為都押官控鶴指揮邢穎為副

引軍屯出河店兩軍對壘女直軍潛渡混同江掩擊遼
衆蕭嗣先軍潰崔公義邢穎耶律佛哩蕭噶克實等死
之其獲免者十七人蕭奉先懼其弟嗣先獲罪輒奏東
征潰軍所至劫掠若不肆赦恐聚為患上從之嗣先但
免官而已諸軍相謂曰戰則有死而無功退則有生而
無罪故士無鬪志望風奔潰十一月壬辰都統蕭迪里
等營于沃狹濼東又為女直所襲士卒死者甚衆甲午
蕭迪里亦坐免官辛丑以西北路招討使耶律鄂爾多

為行軍都統副點檢蕭伊實同知南院樞密使事耶律
章努副之十二月咸賓祥三州及鐵驪烏舍皆叛入女
直伊實往援賓州南軍諸將實喇塔喇等往援咸州並
為女直所敗

遼史卷二十七

遼史卷二十七考證

天祚紀一五年十二月己巳夏國復遣李造福田若水
求援癸酉宋遣林洙來議與夏約和林洙宋史作
林攄

遼史卷二十七考證

欽定四庫全書

遼史卷二十八

元中書右丞相總裁托克托等修

本紀第二十八

天祚皇帝二

五年春正月下詔親征遣僧嘉努持書約和斥阿固達
名阿固達遣薩喇復書若歸叛人阿蘇遷黃龍府於別
地然後議之都統耶律鄂爾多等與女直兵戰于達里

庫城敗績二月饒州渤海古雲等反自稱大王三月以
蕭色佛呼等討之遣耶律章嘉努等六人齎書使女直
斥其主名冀以速降夏四月癸丑蕭色佛呼等為渤海
古雲所敗以南面副部署蕭托斯和為都統赴之五月
托斯和及古雲戰敗績章嘉努等以阿固達書來復遣
之往六月己亥朔清暑特哩嶺壬子章嘉努等還阿固
達復書亦斥名諭之使降癸丑諭諸道親征丙辰托斯
和招獲古雲等癸亥以特哩袞耶律摩哩為北院大王

是月遣蕭色埒使女直以書辭不屈見留秋七月辛未
宋遣使致助軍銀絹丙子獵于嶺東是月都統鄂爾多
等與女直戰于白馬灤敗績八月甲子罷獵趣軍中以
鄂爾多等軍敗免官丙寅以圍場使鄂傳為中軍都統
耶律章嘉努為都監率番漢兵十萬蕭奉先充御營都
統諸行營都部署耶律章努為副以精兵二萬為先鋒
餘分五部為正軍貴族子弟千人為硬軍扈從百司為
護衛軍北出駱駝口以都點檢蕭呼塔噶為都統樞密

直學士柴誼為副將漢步騎三萬南出寧江州自長春
州分道而進發數月糧期必減女直九月丁卯朔女直
軍陷黃龍府己巳知北院樞密使蕭塔剌台出為西南
面招討使色埒還女直復遣薩喇以書來報若歸我叛
人阿蘇等即當班師上親征尼雅滿烏珠等以書來陽
為卑哀之辭實欲求戰書上上怒下詔有女直作過大
軍翦除之語女直主聚衆誇面仰天慟哭曰始與汝等
起兵蓋苦契丹殘忍欲自立國今主上親征奈何非人

死戰莫能當也不若殺我一族汝等迎降轉禍為福諸
軍皆曰事已至此惟命是從乙巳耶律章努反奔上京
謀迎立魏國王淳上遣駙馬蕭昱領兵詣廣平淀護后
妃行宮實達爾伊遜馳書報魏國王王曰此非細事主自
親弟蕭迪里以所謀說魏國王王曰此非細事主自
有諸王當立北南面大臣不來而汝言及此何也密令
左右拘之有頃伊遜等齎御札至備言章努等欲廢立
事魏國王立斬蕭迪里等首以獻單騎間道詣廣平淀

待罪上遇之如初章努知魏國王不聽率麾下掠慶曉
懷祖等州結渤海羣盜衆至數萬趨廣平淀犯行宮順
國女直阿古齊以三百騎一戰而勝擒其貴族二百餘
人竝斬首以徇其妻子配役繡院或散諸近侍為婢餘
得脫者皆奔女直章努詐為使者欲奔女直為邏者所
獲縛送行在腰斬于市剖其心以獻祖廟支解以徇五
路冬十一月遣駙馬蕭特默林牙蕭察喇等將騎兵五
萬步卒四十萬親軍七十萬至馳門十二月乙巳耶律

章嘉努叛戊申親戰于科卜多岡敗績盡亡其輜重已
未錦州刺史耶律珠展叛應章嘉努庚申北面林牙耶
律瑪古討章嘉努癸亥以北院宣徽使蕭罕嘉努知北
院樞密使事南院宣徽使蕭特默為漢人行宮都部署
六年春正月丙寅朔東京夜有惡少年十餘人乘酒執
刃踰垣入留守府問留守蕭保先所在今軍變請為備
蕭保先出刺殺之戶部使大公鼎聞亂即攝留守事與
副留守高清明集奚漢兵千人盡捕其衆斬之撫定其

民東京故渤海地太祖力戰二十餘年乃得之而蕭保
先嚴酷北海苦之故有是變其裨將渤海高永昌偕號
稱隆基元年遣蕭伊實高興順招之不從閏月己亥遣
蕭罕嘉努張琳討之戊午貴德州守將耶律伊都以廣
州渤海叛附永昌我師擊敗之二月戊辰侍御司徒托
卜嘉等討章嘉努戰于祖州敗績乙酉遣漢人行宮都
部署蕭特默率諸將討章嘉努戊子章嘉努誘饒州渤
海及中京賊侯柴等萬餘人攻陷高州三月東面行軍

副統綽哈等擒侯檠于川州夏四月戊辰親征章嘉努
癸酉敗之甲戌誅叛黨饒州渤海平丙子賞平賊將士
有差而蕭罕嘉努張琳等復為賊所敗五月清暑散水
原女直軍攻下瀋州復陷東京擒高永昌東京州縣族
人赫伯道拉烏舍托卜嘉道拉綽哈等十三人皆降女
直六月乙丑籍諸路兵有雜畜十頭以上者皆從軍庚
辰魏國王淳進封秦晉國王為都元帥上京留守蕭托
卜嘉為契丹行宮都部署兼副元帥丁亥知北院樞密

使事蕭罕嘉努為上京留守秋七月獵秋山春州渤海
二千餘戶叛東北路統軍使勒兵追及盡俘以還八月
烏爾古部叛遣中丞耶律托卜嘉招之九月丙午謁懷
陵冬十月丁卯以張琳軍敗奪官庚辰烏爾古部降十
一月東面行軍副統瑪古等攻哈斯罕敗績十二月乙
亥封庶人蕭氏為太皇太妃辛巳削副統耶律瑪古官
七年春正月甲寅減廐馬粟分給諸局是月女直軍攻
春州東北面諸軍不戰自潰孟古皮室四部及渤海人

皆降復下泰州二月涑水縣賊董龐兒聚衆萬餘西京
留守蕭伊實南京統軍都監札拉與戰于易水破之三
月龐兒黨復聚伊實復擊破之于奉聖州夏五月庚寅
東北面行軍諸將聶哱赫魯尼格錫庫等棄市乙巳諸
圍場隙地縱百姓樵採六月辛巳以同知樞密院事額
哩頁為北院大王秋七月癸卯獵秋山八月丙寅獵錫
錫納琳山命都元帥秦晉王赴沿邊會四路兵馬防秋
九月上自燕至陰涼河置怨軍八營募自宜州者曰前

宜後宜自錦州者曰前錦後錦自乾自顯者曰乾曰顯
又有乾顯大營巖州營凡二萬八千餘人也衛州蒺藜
山丁酉獵輞子山冬十月乙卯朔至中京十二月丙寅
都元帥秦晉國王溥遇女直軍戰于蒺藜山敗績女直
復拔顯州旁近州郡庚午下詔自責癸酉遣伊勒希巴
扎拉與大公鼎諸路募兵丁丑西京留守蕭伊實為北
府宰相東北路行軍都統奚錫默知奚六部大王事
是歲女直阿固達用鐵州楊朴策即皇帝位建元天輔國

號金楊朴又言自古英雄開國或受禪必先求大國封冊遂遣議和以求封冊

八年春正月辛駕鶯灤丁亥遣耶律努克等使金議和庚寅保安軍節度使張崇以雙州二百戶降金東路諸州盜賊蜂起掠民自隨以充食二月耶律努克還自金金主復書曰能兄事朕歲貢方物歸我上京中京興中府三路州縣以親王公主駙馬大臣子孫為質還我行人及元給信符并宋夏高麗往復書詔表牒則可以如

約三月甲午復遣努克使金夏四月辛酉以西南面招討使蕭塔喇台為北院樞密使五月壬午朔努克琨以書來約不踰此月見報戊戌復遣努克使金要以酌中之議是月至納克灤賊安生兒張高兒聚衆二十萬耶律瑪古等斬生兒于龍化州高兒亡入懿州與霍六格相合金主遣呼圖克琨與努克持書報如前約六月丁卯遣努克等齎宋夏高麗書詔表牒至金霍六格陷海北州趣義州軍帥和勒博等擊敗之通祺雙遼四州之民八

百餘戶降于金秋七月獵秋山金遣呼圖克琨來免取
質子及上京興中府所屬州郡裁減歲幣之數如能以
兄事朕冊用漢儀可以如約八月庚午遣努克托迪使
金議冊禮九月托迪見留遣努克還謂之曰言如不從
勿復遣使閏月丙寅遣努克復使金而蕭博和哩等十
五人各率戶降于金冬十月努克托迪持金書來龍化
州張應古等四人率衆降金十一月副元帥蕭托卜嘉
薨十二月甲申議定冊禮遣努克使金寧昌軍節度使

劉宏以懿州戶三千降金時山前諸路大饑乾顯宜錦興中等路斗粟直數緡民削榆皮食之既而入相食是年放進士王翬等百三人

九年春正月金遣烏林達贊謨持書來迎冊二月至駕
騫樂賊張薩巴誘中京射糧軍僭號南面軍帥伊都擒
薩巴三月丁未朔遣知右伊勒希巴事蕭實訥埒冊金
主為東懷國皇帝己酉烏林達贊謨努克等先以書報
夏五月準布博斯齊等叛執招討使耶律鄂爾多都監

蕭錫里岱死之秋七月獵南山金復遣烏林達贊謨來
責冊文無凡事之語不言大金而云東懷乃小邦懷其
德之義及冊文有渠材二字語涉輕侮若遂分多貳等
語皆非善意殊乖體式如依前書所定然後可從楊詢
卿羅子韋率衆降金八月以趙王寶訥埒為西京留守
九月至西京復遣寶訥埒楊立忠先持冊藁使金冬十
月甲戌朔耶律辰圖努等二十餘人謀反伏誅是月遣
使送烏林達贊謨持書以還

十年春二月幸駕鶯灤金復遣烏林達贊謨持書及冊
文副本以來仍責乞兵于高麗三月己酉民有羣馬者
令取其一給東路軍庚申以金人所定大聖二字與先
世稱號同復遣實訥埒往議金主怒遂絕之夏四月獵
呼圖哩巴山聞金師再舉耶律拜薩巴等以精兵三千
濟遼師五月金主親攻上京克外郭留守托卜嘉率衆
出降六月乙酉以北府宰相蕭伊實為上京留守知鹽
鐵內省兩司東北統軍司事秋獵沙嶺冬復至西京

遼史卷二十八

遼史卷二十八考證

天慶五年秋七月 按是年為宋徽宗政和五年宋史
書秋七月戊辰朔日食後天慶八年為徽宗重和元
年書五月壬午朔日食九年為徽宗宣和元年書夏
四月丙子朔日食十年為宣和二年書冬十月戊辰
朔日食遼紀並失載

金主復書曰歸我上京中京興中府三路州縣 按原
文作上中京據金史增

寧昌軍節度使劉宏以懿州戶三千降金 按金史亦
書劉宏屬國表作劉完又金持冊使楊立忠屬國表
作楊近忠均一人兩異其名今仍之

遼史卷二十八考證

欽定四庫全書

遼史卷二十九

元中書右丞相總裁托克托等修

本紀第二十九

天祚皇帝三

保大元年春正月丁酉朔改元肆赦初金人興兵郡縣所失幾半上有四子長趙王母趙昭容次晉王母文妃次秦王許王皆元妃生國人知晉王之賢深所屬望元

妃之兄樞密使蕭奉先恐秦王不得立潛圖之文妃姊
妹三人長適耶律達哈拉次文妃次適伊都一日其姊
若妹俱會軍前奉先諷人誣駙馬蕭昱及伊都等謀立
晉王事覺昱達哈拉等伏誅文妃亦賜死獨晉王未忍
加罪伊都在軍中聞之大懼即率千餘騎叛入金上遣
知奚王府事蕭錫默北府宰相蕭德恭太常衮耶律特
哩袞歸州觀察使蕭和尚努四軍太師蕭幹將所部兵
追之及諸間山縣諸將議曰主上信蕭奉先言奉先視

吾輩蔑如也伊都乃宗室豪俊常不肯為奉先下若擒
伊都他日吾黨皆伊都也不若縱之還即紿曰追襲不
及奉先既見伊都之亡恐後日諸校亦叛遂勸驟加爵
賞以結衆心以蕭錫默為奚王蕭德恭試中書門下平
章事兼判上京留守事耶律特哩袞為龍虎衛上將軍
蕭和尚努金吾衛上將軍蕭幹鎮國大將軍二月辛駕
鳶灤夏五月至赫呀蘇秋七月獵炭山九月至南京冬
十一月癸亥以西京留守趙王寶訥埒為特哩袞

二年春正月乙亥金克中京遂下澤州上出居庸關至
鴛鴦濶聞伊都引金人羅索貝勒奄至蕭奉先曰伊都
乃王子班之苗裔此來欲立甥晉王耳若為社稷計不
惜一子明其罪誅之可不戰而伊都自迴矣上遂賜晉
王死素服三日耶律薩巴等皆伏誅王素有人望諸軍
聞其死無不流涕由是人心解體伊都引金人通行宮
上率衛兵五千餘騎幸雲中遺傳國璽于桑乾河二月
庚寅朔日有食之既甲午知北院大王事耶律瑪古漢

人行宮都部署蕭特默竝為都統大和宮使耶律布達
副之將兵屯鴛鴦濼己亥金師敗奚王哈瑪爾于北安
州降其城三月辛酉上聞金師將出嶺西遂趨白水濼
乙丑羣牧使穆喇幹降金丙寅上至努克特倉聞金兵
將近計不知所出乘輕騎入夾山方悟奉先之不忠怒
曰汝父子誤我至此今欲誅汝何益于事恐軍心忿怨
爾曹避敵苟安禍必及我其勿從行奉先下馬哭拜而
去行未數里左右執其父子縛送金兵金人斬其長子

昂以奉先及其次子昱械送金主道遇遼軍奪以歸國
遂竝賜死逐樞密使蕭塔喇台召托卜嘉典禁衛丁卯
以北院樞密副使蕭僧孝努知北院樞密使事同知北
院樞密使事蕭扎拉為左伊勒希巴戊辰同知殿前點
檢事耶律果巴率衛士降金己巳偵人蕭和尚牌印郎
君耶律希斯為金所獲癸酉以諸局百工多亡凡扈從
不限吏民皆官之初詔留宰相張琳李處溫與秦晉國
王淳守燕處溫聞上入夾山數日命令不通即與弟處

能子夷外假怨軍內結都統蕭幹謀立淳遂與諸大臣
耶律達實左企弓虞仲文曹勇義康公弼集番漢百官
諸軍及父老數萬人詣淳府處溫邀張琳至白其事琳
曰攝政則可處溫曰天意人心已定請立班耳處溫等
請淳受禮淳方出李夷持赭袍被之令百官拜舞山呼
淳驚駭再三辭不獲已而從之以處溫守太尉左企弓
守司徒曹勇義知樞密院事虞仲文參知政事張琳守
太師李處能直樞密院李夷為少府少監提舉翰林醫

官李爽陳秘十餘人曾與大計竝賜進士及第授官有
差蕭幹為北樞密使駙馬都尉蕭旦知樞密院事改怨
軍為常勝軍於是肆赦自稱天錫皇帝改元建福降封
天祚為湘陰王遂據有燕雲平及上京遼西六路天祚
所有沙漠已北西南西北路兩都招討府諸番部族而
已夏四月辛卯西南面招討使耶律佛騰降金雲內寧
邊東勝等州皆降阿蘇為金兵所擒金已取西京沙漠
以南部族皆降上遂遁於額蘇掄時北部瑪克實驢馬

馳食羊五月甲戌都統瑪古收集散亡會于額勒錦丙
子以瑪古知北院樞密使事兼都統六月淳寢疾聞上
傳檄天德雲內朔武應蔚等州合諸番精兵五萬騎約
以八月入燕并遣人問勞索衣裘茗藥淳甚驚命南北
面大臣議而李處溫蕭幹等有迎秦拒湘之說集番漢
百官議之從其議者東立惟南面行營都部署耶律寧
西立處溫等問故寧曰天祚果能以諸番兵大舉奪燕
則是天數未盡豈能拒之否則秦湘父子也拒則皆拒

自古安有迎子而拒其父者處溫等相顧微笑以寧肩
亂軍心欲殺之淳欵枕長歎曰彼忠臣也焉可殺天祚
果來吾有死耳復何面目相見耶已而淳死衆乃議立
其妻蕭氏為皇太后主軍國事奉遺命迎立天祚次子
秦王定為帝太后遂稱制改元德興處溫父子懼禍南
通童貫欲挾蕭太后納土于宋北通于金欲為內應外
以援立大功自陳蕭太后罵曰誤秦晉國王者皆汝父
子悉數其過數十賜死嚙其子夷而磔之籍其家得錢

七萬緡金玉寶器稱是為宰相數月之間所取也瑪克
實以兵來援為金人敗于鴻和水擒其子托果及其屬
阿敦夏國援兵至亦為金兵所敗秋七月丁巳德呼勒
部皮室叛烏爾古部節度使耶律唐古討平之加太子
太保乙丑上京茂巴克實率二千戶降金辛未夏國遣
曹价來問起居八月戊戌親遇金軍戰于石輦驛敗績
都統蕭特默及其姪薩古被執辛丑會軍于歡塔察拉
金兵追之棄輜重以遁九月德呼勒部叛都統瑪古克

之冬十月金兵攻蔚州降十一月乙丑聞金兵至奉聖
州率衛兵屯于埧克塞泰晉王淳妻蕭德妃五上表于
金求立秦王不許以勁兵守居庸及金兵臨關厓石自
崩戍卒多壓死不戰而潰德妃出古北口趨天德軍十
二月知金主撫定南京上遂由薩里關出居四部族詳
衮之家

三年春正月丁巳奚王和勒博僭號稱天復元年命都
統瑪古討之甲子初張穀為遼興軍節度副使民推穀

領州事秦晉王淳既死蕭德妃遣錫凌阿知平州。錫知
遼必亡。練軍實籍丁壯為備。錫凌阿至弗納。金帥尼雅
滿入燕首問平州事於故參知政事康公弼。公弼曰。鈇
狂妄寡謀。雖有鄉兵。彼何能為。示之不疑圖之。未晚。金
人招錫凌阿赴軍前。加鈇臨海軍節度使。仍知平州。既
而又欲以精兵三千先下平州。擒張鈇。公弼曰。若加兵
是趣之叛也。公弼請自往覘之。鈇謂公弼曰。遼之八路
七路已降。獨平州未降者。防蕭幹耳。厚賂公弼而還。公

弼復尼雅滿曰彼無足慮金人遂改平州為南京加設
試中書門下平章事判留守事庚辰宜錦乾顯成川豪
懿等州相繼皆降上京盧彥綸叛殺契丹人二月乙酉
朔興中府降金來州歸德軍節度使田顯權隰州刺史
杜師回權遷州刺史高永昌權閏州刺史張成皆籍所
管戶降金丙戌誅蕭德妃降淳為庶人盡釋其黨癸巳
興中宜州復城守三月駐蹕于雲內州南夏四月甲申
朔以知北院樞密使蕭僧孝努為諸道大都督丙申金

兵至居庸關擒耶律達實戊戌金兵圍輜重于青塚硬寨太保特默格竊梁王雅里以遁秦王許王諸妃公主從臣皆陷沒庚子梁宋大長公主托里亡歸壬寅金遣人來招癸卯答言請和丙午金兵送族屬輜重東行乃遣兵邀戰于白水濼趙王實訥埒蕭道寧被執上遣牌印卽君穆剌幹送兔紐金印偽降遂西遁雲內駙馬都尉潤諾遽詣金降己酉金復以書來招答其書壬子金帥書來不許請和是月特默格挈雅里至上怒不能盡

救諸子詰之五月乙卯夏國王李乾順遣使請臨其國
庚申軍將耶律廸里等夜劫梁王雅里奔西北部立以
為帝改元神厯辛酉渡河止于金肅軍北和勒博為衆
所殺六月遣使冊李乾順為夏國皇帝秋九月耶律達
實自金來歸冬十月復渡河東還居圖魯卜部梁王雅
里歿耶律珠拉繼之十一月圖烈為衆所殺

四年春正月上趨都統瑪古軍金人來攻棄營北遁瑪
古被執瑪克實來迎贖馬駝食羊率部人防衛時侍從

乏糧以衣易羊至烏爾古德呼勒部以都點檢蕭伊實
知北院樞密使事封瑪克實為神裕悅王特默格降金
二月耶律約蘇等十人謀叛伏誅夏五月金人既克燕
驅燕之大家東徙以燕空城及涿易檀順景薊州與宋
以塞盟左企弓康公弼曹勇義虞仲文皆東遷燕民流
離道路不勝其苦入平州言於留守張鼓曰宰相左企
弓不謀守燕使吾民流離無所安集公今臨巨鎮握強
兵盡忠於遼必能使我復歸鄉土人心亦惟公是望鼓

遂召諸將領議皆曰聞天祚兵勢復振出沒漠南公若
仗義勒王奉迎天祚以圖中興先責左企弓等叛降之
罪而誅之盡歸燕民使復其業而以平州歸宋則宋無
不接納平州遂為藩兵即後日金人加鎮矣內用平州之
軍外得宋為之援又何懼焉穀曰此大事也不可草草
翰林學士李石智而多謀可召與議石至其言與之
合乃遣張譙率五百餘騎傳留守令召宰相左企弓曹
勇義樞密使虞仲文參知政事康公弼至灤河西岸遣

議事官趙秘校徃數十罪曰天祚播遷夾山不即奉迎
一也勸皇叔秦晉王僭號二也詆訐君父降封湘陰三
也天祚遣知閣王有慶來議事而殺之四也檄書始至
有迎秦拒湘之議五也不謀守燕而降六也不顧大義
臣事于金七也根括燕財取悅于金八也使燕人遷徙
失業九也教金人發兵先下平州十也爾有十罪所不
容誅左企弓等無以對皆縊殺之仍稱保大三年盡天
祚象朝夕謁事必告而後行稱遼官秩六月榜諭燕人

復業恒產為常勝軍所占者悉還之燕民既得歸大悅翰林學士李石更名安弼偕故三司使高黨往燕山說宋王安中曰平州帶甲萬餘穀有文武材可用為屏翰不然將為肘腋之患安中深然之令安弼與黨詣宋宋主詔帥臣王安中詹度厚加安撫與免三年常賦穀聞之自謂得計秋七月金人屯來州棟摩聞平州附宋以二千騎問罪先入營州穀以精兵萬騎擊敗之宋建平州為泰寧軍以穀為節度使以安弼黨為徽猷閣待制

令宣撫司出銀絹數萬犒賞，穀喜遠迎。金人諜知舉兵來襲，穀不得歸，奔燕。金人克三州，始來索穀。王安中諱之，索急，斬一人，貌類者去。金人曰：「非穀也。」以兵來取。安中不得已，殺穀，函其首送金。天祚既得林牙耶律達實兵歸，又得陰山室韋瑪克實兵，自謂得天助，再謀出兵。復收燕雲，達實林牙力諫曰：「自金人初陷長春、遼陽，則車駕不幸，廣平淀而都中京，及陷上京，則都燕山及陷中京，則幸雲中。自雲中而播遷夾山，向以全師不謀戰備，使舉國漢

地皆為金有國勢至此而方求戰非計也當養兵待時而動不可輕舉不從達實遂殺伊實及博勒和置北南面屬自立為王率所部西去上遂率諸軍出夾山下漁陽嶺取天德東勝寧邊雲內等州南下武州遇金人戰于昂阿下水復潰直趨山陰八月國舅詳袞蕭托卜嘉筆硯祗候察喇降金是月金主阿固達死九月建州降金冬十月納圖魯卜部人額爾克之妻恩克以額爾克為本部節度使扎古雅降金金攻興中府降之十一月從行者舉兵亂北護衛太保珠展錫里

詳袞額布勒等擊之十二月置二總管府

遼史卷二十九

遼史卷二十九考證

若擒伊都 按伊都即前後原文余覩此作余都又都

統蕭幹訛蕭幹俱畫一改

保大二年二月庚寅朔日有食之既 按遼自太祖至

此凡二百十餘年所書日食止二十九史臣於歷象

志云日食星變風雲震雪之祥具載帝紀乃質之新

舊唐書五代史宋史及契丹國志等書遼紀獨略再

考保大二年為徽宗宣和四年宋史於二月庚寅朔

未書日食此又宋史之闕

遣議事官趙秘校往數十罪

按契丹國志作趙能

遼史卷二十九考證

欽定四庫全書

遼史卷三十

元中書右丞相總裁托克托等修

本紀第三十

天祚皇帝四

五年春正月辛巳黨項小呼嚕遣人請臨其地戊子趨
天德過沙漠金兵忽至上徒步出走近侍進珠帽却之
乘張仁貴馬得脫至天德己丑遇雪無禦寒具珠展以

貂裘帽進途次絕糧珠展進赴與棗欲憩珠展即跪坐倚之假寐珠展輩惟齧冰雪以濟饑過天德至夜將宿民家紹曰偵騎其家知之乃叩馬首跪而大慟潛宿其家居數日嘉其忠遙授以節度使遂趨党項以小呼嚕為西南面招討使總知軍事仍賜其子及諸校爵賞有差二月至應州新城東六十里為金人完顏羅索等所獲八月癸卯至金丙午降封海濱王以疾終年五十有四在位二十四年金皇統元年二月改封豫王五年葬

于廣寧府閭陽縣乾陵傍耶律淳者世號為北遼淳小字聶呼興宗第四孫南京留守宋魏王和囉噶之子清寧初太后鞠育之既長篤好文學昭懷太子得罪上欲以淳為嗣上怒耶律拜薩巴知與淳善出淳為彰聖等軍節度使天祚即位進王鄭乾統二年加越王六年拜南府宰相首議制兩府禮儀上喜徙王魏其父和囉噶薨即以淳襲父守南京冬夏入朝寵冠諸王天慶五年東征都監章努濟鴨子河與淳子阿薩爾等三百餘人

亡歸先遣迪里以廢立之謀報淳淳斬迪里首以獻進
封秦晉國王拜都元帥賜金券免漢拜禮不名許自擇
將士乃募燕雲精兵東至錦州隊長武朝彥作亂劫淳
淳匿而免收朝彥誅之會金兵至聚兵戰于阿爾展圖
敗績收亡卒數千人拒之淳入朝釋其罪詔南京刻石
紀功保大二年天祚入夾山奚王和勒博林牙耶律達
實等引唐靈武故事議欲立淳淳不從官屬勸進曰主
上蒙塵中原擾攘若不立王百姓何歸宜熟計之遂即

位百官進號天錫皇帝改保大二年為建福元年大赦
放進士李寶信等一十九人遙降天祚為湘陰王以燕
雲平上京中京遼西六路淳主之沙漠以北南北路兩
都招討府諸番部族等仍隸天祚自此遼國分矣封其
妻普賢女為德妃以和勒博知北院樞密使事軍族之
事悉委達實又遣使報宋免歲幣結好宋人發兵問罪
擊敗之尋遣使奉表于金乞為附庸事未決淳病死年
六十百官偽謚曰孝章皇帝廟號宣宗葬燕西香山永

安陵遺命遙立秦王定以存社稷德妃為皇太后稱制
改建福為德興元年放進士李球等百八人時宋兵來
攻戰敗之由是人心大悅兵勢日振宰相李純等潛納
宋兵居民內應抱關者被殺甚眾翌日攻內東門衛兵
力戰宋軍大潰踰城而走死者相籍五表于金求立秦
王不從而金兵大至德妃奔天德軍見天祚天祚怒誅
德妃降淳庶人除其屬籍耶律雅里者天祚皇帝第二
子也字薩蘭七歲欲立為皇太子別置禁衛封梁王保

大三年金師圍青塚寨雅里在軍中太保特默格挾之
出走間道行至陰山聞天祚失利趨雲內雅里馳赴時
扈從者千餘人多於天祚天祚慮特默格生變欲誅之
責以不能全救諸王將訊之仗劍召雅里問曰特默格
教汝何為雅里對曰無他言迺釋之天祚渡河奔夏隊
帥耶律迪里等劫雅里北走至沙嶺見蛇橫道而過識
者以為不祥後三日羣僚共立雅里為主雅里遂即位
改元神厯命士庶上便宜雅里性寬大惡誅殺獲亡者

答之而已有自歸者即官之因謂左右曰欲附來歸不
附則去何須威逼耶每取唐貞觀政要及林牙資忠所
作治國詩令侍從讀之烏爾古部節度使扎扎德呼勒
部統軍托卜嘉都監圖魯卜等率衆來附自是諸部繼
至而雅里日漸荒急好擊鞠特默格切諫乃不復出以
耶律迪里為樞密使特默格副之迪里劾西北路招討
使蕭扎里熒惑衆心志有不臣與其子瑪尼竝誅之以
約蘇為招討使與諸番戰數敗杖免官從行有疲困者

輒振給之直長保德諫曰今國家空虛賜賚若此將何以相給耶雅里怒曰昔畋於福山卿誣獵官今復有此言若無諸部我將何取不納初令羣牧運鹽灤倉粟而民盜之議籍以償雅里乃自為直每粟一車償一羊三車一牛五車一馬八車一駝左右曰今一羊易粟二斗且不可得乃償一車雅里曰民有則我有若令盡償民何堪後獵扎拉山一日而射黃羊四十狼二十一因致疾卒年三十耶律達實者世號為西遼達實字重德太

祖八代孫也通遼漢字善騎射登天慶五年進士第擢翰林應奉尋陞承旨遼以翰林為林牙故稱達實林牙
歷秦祥二州刺史遼興軍節度使保大二年金兵日逼
天祚播越與諸大臣立秦晉王淳為帝淳死立其妻蕭
德妃為太后以守燕及金兵至蕭德妃歸天祚天祚怒
誅德妃而責達實曰我在汝何敢立淳對曰陛下以全
國之勢不能一拒敵棄國遠遁使黎民塗炭即立十淳
皆太祖子孫豈不勝乞命於他人耶上無以答賜酒食

赦其罪達實不自安遂殺蕭伊實博勒和自立為王率
鐵騎二百宵遁北行三日過黑水見白達勒達詳袞崇
古嚕崇古嚕獻馬四百駝二十羊若干西至哈屯城駐
北康都護府會威武崇德會蕃新大林紫河駝等七州
及大黃室韋德呼勒昂吉爾察察哩約喜布古德尼勒
搭喇庫德摩哩默爾吉和卓烏庫哩準布博克碩寬唐
古呼穆蘇希達濟勒貝十八部王衆諭曰我祖宗艱難
創業厯世九主厯年二百金以臣屬殘毒我黎庶屠翦

我州邑使我天祚皇帝蒙塵于外日夜痛心疾首我今
仗義而西欲借力諸番翦我仇敵復我疆宇惟爾衆亦
有軫我國家憂我社稷思共救君父濟生民於難者乎
遂得精兵萬餘置官吏立排甲具器仗明年二月甲午
以青牛白馬祭天地祖宗整旅而西先遺書於回鶻王
必里克曰昔我太祖皇帝北征過巴噶罕城遣使至甘
州詔爾祖烏穆珠曰汝思故國耶朕即為汝復之汝不
能返耶朕則有之在朕猶在爾也爾祖即表謝以為遷

國于此十有餘世軍民皆安土重遷不能復返矣是與爾國非一日之好也今我將西至大食假道爾國其勿致疑必里克得書即迎至邸大宴三日臨行獻馬六百駝百羊三千願質子孫為附庸送至境外所過敵者勝之降者安之兵行萬里歸者數國獲駝馬牛羊財物不可勝計軍勢日盛銳氣日倍至塔什干西域諸國舉兵十萬號呼喇繖來拒戰兩軍相望二里許諭將士曰彼軍雖多而無謀攻之則首尾不救我師必勝遣六院司

大王蕭額哩埒招討副使耶律松山等將兵二千五百
攻其右樞密副使蕭扎倫布招討使耶律穆蘇等將兵
二千五百攻其左自以衆攻其中三軍俱進呼喇織大
敗僵屍數十里駐軍塔什干凡九旬回回國王來降貢
万物入西至奇爾瑪勒文武百官冊立達實為帝以甲
辰歲二月五日即位年三十八號格爾干復上漢尊號
曰天祐皇帝改元延慶追謚祖父為嗣元皇帝祖母為
宣義皇后冊元妃蕭氏為昭德皇后因謂百官曰朕與

卿等行三萬里跋涉沙漠夙夜艱勤賴祖宗之福卿等
之力冒登天位爾祖爾父宜加卹典共享尊榮自蕭額
哩埒等四十九人祖父封爵有差延慶三年班師東歸
馬行二十日得善地遂建都城號呼遜鄂爾多改延慶
為康國元年三月以六院司大王蕭額哩埒為兵馬都
元帥德呼勒部前同知樞密院事蕭札倫布副之察察
哩部圖魯耶律燕山為都部署護衛耶律特爾格為都
監率七萬騎東征以青牛白馬祭天樹旗以誓衆曰我

大遼自太祖太宗艱難而成帝業其後嗣君耽樂無厭
不恤國政盜賊蠭起天下土崩朕率爾衆遠至朔漠期
復大業以光中興此非朕與爾世居之地申命元帥額
哩埒曰今汝其往信賞必罰與士卒同甘苦擇善水草
以立營量敵而進毋自取禍敗也行萬餘里無所得牛
馬多死勒兵而還達實曰皇天弗順數也康國十年歿
在位二十年廟號德宗子伊立幼遺命皇后權國后
名塔布布延號感天皇后稱制改元咸清在位七年子伊

立即位改元紹興籍民十八歲以上得八萬四千五百
戶在位十三年歿廟號仁宗子幼遺詔以妹博克碩寬
權國稱制改元崇福號承天太后後與駙馬蕭國魯卜
弟巴噶濟蘇爾通出駙馬為東平王羅織殺之駙馬父
額哩埒以兵圍其宮射殺博克碩寬及巴噶濟蘇爾博
克碩寬在位十四年仁宗次子珠勒呼即位改元天禧
在位三十四年時秋獵柰曼王庫楚埒伏兵八千擒之
據其位遂襲遼衣冠尊珠勒呼為太上皇皇后為皇太

后朝夕問起居以待終焉珠勒呼死遼絕耶律淳在天
祚之世歷王大國受賜金券贊拜不名一時恩遇無與
為比當天祚播越以都元帥留守南京獨不可奮大義
以激燕民及諸大臣興勤王之師東拒金而迎天祚乎
乃自取之是篡也況忍王天祚哉達實既帝淳而王天
祚矣復歸天祚天祚責以大義乃自立為王而去之幸
藉祖宗餘威遺智建號萬里之外雖寡母弱子更繼迭
承幾九十年亦可謂難矣然淳與雅里達實之立皆在

天祚之世有君而復君之其可乎哉諸葛武侯為獻帝
發喪而後立先主為帝者不可同年語矣故著以為戒
云

贊曰遼起朔野兵甲之盛鼓行竅外席卷河朔樹晉楨
漢何其壯歟太祖太宗乘百戰之勢輯新造之邦英謀
叡畧可謂遠矣雖以世宗中才穆宗殘暴連遭弑逆而
神器不搖蓋由祖宗威令猶足以震疊其國人也聖宗
以來內修政治外拓疆宇既而申固鄰好四境乂安維

持二百餘年之基有自來矣降臻天祚既丁未運又缺
人望崇信姦回自掾國本羣下離心金兵一集內難先
作廢立之謀叛亡之迹相繼蠱起馴致土崩瓦解不可
復支良可哀也耶律與蕭世為甥舅義同休戚奉先挾
私藏公蕭馭構難一至於斯天祚窮蹙始悟奉先誤已
不既晚乎淳雅里所謂名不正言不順事不成者也達
實苟延彼善於此亦幾何哉

遼史卷三十

遼史卷三十考證

耶律淳者世號為北遼 按紀叙淳由節度進鄭王宏

簡錄載淳初封北平郡王即北遼所由稱

以耶律迪里為樞密使 迪里舊作敵列此作敵烈續

通鑑作特列又濟勤貝舊作紀而畢部族表作紀而

畢皆係一人而書名互異今畫一改

遼史卷三十考證